

四庫全書

集部

欽定四庫全書

集部

襄毅文集卷

三至五

詳校官庶吉士_臣陳若霖

中書_臣劉源溥覆勘

總校官檢討_臣何思鈞

校對官中書_臣楊世綸

謄錄監生_臣譚廷和

欽定四庫全書

襄毅文集卷三

明韓雍撰

五言律詩

壽大司寇楊公二首

四月二十九日

身荷三朝寵官聯八座榮提兵不妄殺讞獄只求生龜
鶴應無羨熊羆定有徵賓筵多祝頌誰似故人情

當代推人物惟公獨占魁清才多裨益陰德久栽培應

得明珠晚何妨白髮催佳辰隔千里無計勸霞杯

送吳布政致政還毘陵

盛滿心知足歸休志已伸樂天陪九老萊子慰雙親風
月開三徑山林見幾人西江有棠樹千載憶斯民

夜訪李少卿回至蓮塘寺同宿次少陵韻二首

官道千山迥禪宮一徑幽故人遠相送邀我試同遊野
燒隨明滅空雲任去留老僧惟面壁不解利名愁

招提薄暮至夾道樹重重枝綴青猿果巢深白鶴松因

聞禪語秘頓使宦情慵清絕題詩處山寒雪滿峰

題齊氏族譜

金都事求

營丘宗法廢今喜子孫賢世系千年定親疎一本傳
載歌頻升句不誦角弓篇珍重藏詩譜家聲繼鄭玄

贈李伯顥下第

窮達皆由命愁顏且暫開君宜登此選天欲老其才
舊學還加勉初心慎莫灰東風雲路濶還擬占春魁

輓成規御史

以言事罷官

投簪拂袖還清望重於山舉世有公論知君無厚顏高
風今寂寞流水自潺湲千載看青史臺臣第一班

偶成

二旬登上第十載位都堂遭遇古來少感恩何日忘不
須論毀譽焉用卜行藏誓竭駘力終身報聖皇

酬德詩謝鄉友徐文輝以僕書童見遺

與君交十載德義重雷陳分取文房僕相資客路人隨
車春護節掃榻夜鋪茵愧乏瓊瑤報題詩播縉紳

山行即事有感二首寄李九川

遠涉登登路愁衝活活泥雲遮山脊斷雨助水聲淒村
火青烟濕林花翠霧迷誰憐宦遊客驄馬不停蹄
草暗原頭路花粘屐齒泥農家一村聚收笛數聲淒旅
館時時盼鄉山望望迷東林有歸客恠底厭輪蹄

山家

級級山田畔農家住不移增節苦破屋編竹補殘籬日
煖開蚕早雲深放犢遲年年了租稅免得吏人欺

寄梅貢士鼎

青春人共誇文彩玉無瑕
筆掃龍蛇陣胃蟠錦繡車
月宮曾折桂杏苑擬探花
遲爾雲霄上同心佐帝家

寄陸尚文

東郭一尊酒西江千里程
故人不可即孤客若為情
秋天風厚時來羽翮輕
扶搖九萬里洗耳聽蜚聲

寄秦以忠

宿別城東寺參商歲月長
天涯懷故舊客況最淒涼
大

器晚方就寸陰今正忙西風動寥廓期爾快翱翔

宿戈陽山家將明悵然兼憶李少卿二首

遠路倦行邁山家宿漸明催衣勤漏鼓聒枕亂鷄聲樹
杪搖風嚮簷頭溜雨鳴故鄉在何處展轉不勝情

達人林下卧春夢最分明不設重門險何須擊柝聲曲
肱如尺穩鼾鼻似雷鳴任爾朝慵起都無塵世情

寄張維本陰陽官兼管盤學

殘雪江村曉維舟曾訪君顏華嗟久別消息喜相聞步

野尋春樂登臺望夜氛此中有真樂應咲獨紛紛

壽閻菴王先生

中年增一筭八月慶初辰黃鶴山頭日紫薇堂上人恩
添江水遠香發桂枝新無限殷勤祝楚天南望頻

項蓋臣憲副曾與予同除廣東茲聞擢陝西憲使
寄詩為賀

同捧外臺檄憐君獨滯留清才不可掩高位豈須求馬
度函關曉雲開華嶽秋相期守初志聯步鳳池頭

瘡疾在告蒙恩命鑿調治既痊入謝賦詩志感

移病閉閑門矜憐感至尊上鑿調善藥衰疾去深根蒲
柳重榮日乾坤再造恩時平無可報空有赤心存

題邵真人畫贈唐廷璋

仙子寫山川風標自入玄草堂芳樹裏蕭寺碧雲邊釣
叟方移棹行人未息肩平生出塵想對此一凄然

辛巳四月自大同宣府還朝議政五月八日陞辭
還鎮蒙恩賜酒飯賜鈔千貫且命中官諭旨慰勉

賦此志感

付託慚無效趨朝不自安
恐干天憲重翻拜聖恩寬
楮幣來中使瓊筵出大官
重還何以報惟有一心丹

過居庸

居庸天下險山勢入青蒼
路轉羊腸曲溪分鴈尾長
關門嚴虎豹烽堠禦豺狼
願保藩屏固皇圖萬世昌

寄袁州莫別駕伯顯

鳥外雲初淨
宜陽望眼舒
故人久相別
佐郡近何如
分

駕春行部休衙夜誦書仰山遺廟在希古莫躊躇

山翁

屋枕楚山麓門臨湘水濱樹深啼鳥亂網便得魚新塵
世無他慮閒居老此身悠悠倦行客轉盼慕斯人

為趙總兵題扇

握柄炎荒外三軍聽指麾良籌先已定多筭出還奇瘴
霧隨時掃清風到處吹題詩比勲德無忝趙征夷

示彭節歸任

辟爾遠從征賢勞重有聲馬前朝草檄幙下夜談兵奏
凱還鄉去迎親宰驛行中原若開府徵用更非輕

題三洲巖

在德慶

開闢分元氣陶鎔屬化工一拳平地上萬象太虛中感
古思羊祐脩真慕葛洪登臨動高興長嘯海天空

送鴻臚寺鄧主簿送安南使臣事竣還京師

相逢遽相別歸計憶神京百粵風塵淨孤舟日夜行遠
人空戀德老我不勝情道出吳門下煩君一寄聲

送周漢章還吳

轅門一相見聲價重南金
獻我平蠻策憐君為國心
別違還錦里崇報待綸音
無限思鄉意題詩淚滿襟

喜聞臺長李公總戎趙公同奉命出師遼東心同
力同功成必矣寄鄙詩預申賀臆

愛我同臺長公清果獨賢
立朝纔幾日出塞屢經年
北敵終顛覆東人解倒懸
征夷又豪傑同擬上凌煙

贈南海張行人戰

十載皇華使賢名動四方又乘司馬傳重過魏公鄉書
錦添新彩寒梅發古香榮恩須補報莫遣歲時荒
塞北曾相識越南今又逢如何兩蓬鬢都未歇萍蹤對
酒心同感恩鄉興獨濃無能了公事悵別意重重

送駱司訓秩滿赴京

羨君司訓久遺愛入人深已有成材效都無計利心離
筵歌白雪別淚濕青襟此去應遭遇春風聽好音

思親堂為吳縣主簿李京春題

椿凋萱尚茂遊子思難禁長望號天地如何分古今不
回觀化夢空負倚閭心惟有脩臣節榮親報亦深

挽駱司訓乃尊易簡翁

易簡久即世如何人共憐曾看太史傳又見令郎賢孝
行詞林頌書香泮水傳懸知無愧怍含笑入重泉

題致政張起韶太守雙雁圖

高飛出上林旅立在江潯不戀稻粱美自怡雲水深弋
人空遠慕野鳥謾相侵還看騰霄去春風聽好音

舟至南浦適親友袁州同知莫伯顯來考績既送
予至豐城書此贈別

良會不易得聯舟三日行喜君書上最與我叙離情循
吏真無忝交親預有榮明廷公論在看爾奮鵬程

成化七年春二月十有八日余與總鎮太監陳公總
兵官平江伯陳公視耀武揚威關二公留欸慶林寺
寺前山坡之上其平如掌下臨長江旁列茂樹衆登
覽為之躍然喜勝地之偶得感二公之高情而慨念

時事遂及西師不覺浩然興發因作一詩書貽寺僧
同遊者叅議王孟育馮文綱也

嚴關閱初遍下馬憩禪林樹覆連天幙泉鳴隔澗琴憂
民成老疾報國喜同心聞道西征急何時聽捷音

謝陳總兵送氍帽

瘴鄉風力惡頭骨痛難禁新帽勞君送高情愛我深清
晨籠短髮暖氣溫華簪感德慚無報緘詩表寸忱

四月十三日西軒晚坐偶成

池亭晚來坐對景已忘言月色猶未滿蛙聲空自喧八年遊嶺海何日到鄉園西北還多事冥思心更煩

輓南京大理何寺丞衷

詳刑初拜命觀化遽傷生未授廷丞席空蜚徐杜聲金陵歸旅襯玉峽起新塋留得秋臺績無慚甲第名

李節婦詩

有序

戶部員外郎李君汝嘉奉使來兩廣為予言其祖母陳孺人年二十歸其祖甫二載祖遊學武岡卒孺人

煢煢無依或憐其早寡諷以他適孺人以死誓而止
守志三十年貞白之節如一日鄉人謀欲達諸郡邑
奏請旌表孺人力辭乃弗果茲不及養矣汝嘉恒痛
悼焉予聞而偉之作詩以傳

苦節三十載一鄉人共尊薦書辭達上恩典未旌門笥
采名不死共姜詩尚存相將荷褒贈雲路有賢孫

壽張同年都憲

老我同年友相逢總異鄉一尊初慶度七夕喜新涼撫

鎮勲勞大驅馳道路長無能遙附驥凝睇海茫茫

襄毅文集卷三

欽定四庫全書

襄毅文集卷四

明 韓雍 撰

七言律詩

題聚奎樓

江西貢院舊有樓時當大比予撤而新之扁曰聚奎
亞卿楊公賦二詩落成予次其韻

腰橫博帶氣橫秋
倣古掄材共倚樓
楊子從來識詞賦

魏公元薄快恩讐疎簾秀捲青山入高棟光依白日浮
聞道邊塵猶未洗欲升豪傑挽河流

樓成星聚兆文明此日登臨客況清報國未能酬素志
興賢深望濟蒼生雲開南浦雙眸豁月照東湖一掌平
寄語蘇公好珍重莫教方叔誤時名

題塵清亭

亞卿楊公撫江西郡邑康靖行臺之西草塘之濱有
亭名曰塵清公賦二詩予次其韻

亭上花枝覆草塘
亭前流水引源長
移來湘浦千竿雨
分得濂溪十里香
吟到碧天明月上
醉眠白石晚風涼
太平自有無窮樂
不為吹笙雜鼓篁

一塵不到草亭深
雅稱秋臺鐵石心
星聚衣冠占太史
風流觴詠繼山陰
柑分低樹和煙摘
酒出行厨帶月斟
賓主淹留歸路晚
滿天風露夜沈沈

壽詹事府唐錄事先生

八月二十六日

滿袖天香午退朝
華堂開宴沸雲韶
青田白鶴仙風在

繡紱蒼麟瑞應昭事業終期齊廣受壽齡還擬等松喬
酒酣試倚闌干望南極文星映九霄

重慶堂為貢士顧禎題

其祖已故

可樂無如具慶心君家重慶樂尤深報劉殊勝陳情密
事點還同養志參百歲奉萱培二本一生愛日惜分陰
高堂華扁須珍重早晚恩光凝照臨

營建紀成陳都堂命為阮太監題

內相承宣下玉階經營殊不費民財聖明仁化如天覆

黎庶懽心若子來洛水功成光鎬邑斯干詩咏繼靈臺
有周儷美逢今日欲獻賡歌愧非才

輓道士陳緝熙求

九轉丹成生羽翰煙霞拂袖出塵寰壺中演秘龍初伏
島外尋真鶴未還松逕淨迷蒼雪冷竹窓空鎖白雲間
洞庭涼夜吹簫過水滿江天月滿山

長洲張醫士妻葬青龍塢陳都堂命作輓詩

瑤池會看舞山香塵滿芙蓉月滿堂烏鵲橋空紅雨亂

青龍塢遠白雲荒
醫傳上國思賢助
學富東吳慕義方
羸得鄉評重潛德
為題詩句共揄揚

輓薛亞卿父

詞翰兼優絕代無
養高不受俗塵汙
忽從瑤水羣仙會
遂判香山九老圖
丹鳳銜書恩禮重
蒼龍解紱淚痕枯
傳家幸有臯陶子
大展經綸弼聖謨

送楊練師受度牒還山陳緝熙求

早聞學道出塵寰
今喜觀光覲聖顏
黃石素書傳圯上

青牛紫氣度函關九重帝澤千年過萬里仙槎八月還
此去知君招不得想應跨鶴入茅山

題吳御史昌衍所藏先世菊隱卷

失而復得

三逕黃花事退休故家詩畫幾時留滿箋香墨騰風露
萬斛明珠綴冕旒沅落久嗟遺澤泯來歸深喜後人求
珍藏莫道凋零盡尚有文光射斗牛

輓姑蘇張醫士

遁跡吳山世業醫家聲高與古人期杏栽董奉空千樹

鶴駕蘇耽去幾時
松柏寒雲愁滿地
梧桐秋雨淚連枝
百年餘慶今何在
羸得諸郎有白眉

題顧仲禮藏春樓

香滿吳山總是春
樓中春意浩無垠
暖風入座鳥聲細
晴雨捲簾花氣新
萬物均含形色性
一腔同寓發生仁
何當袖拂煙霞去
卜築相依養道真

屏山樓胡御史拱辰為舒安求

名山相對構層樓
山勢如平翠欲流
雲捲半簾天影近

風來滿座雨聲浮
羊元獨卧筠床晚
蘇軾重遊赤壁秋
千載芳名今並美
好傳家業振箕裘

松軒為鄉人題

百畝田園萬樹松
結軒相對日從容
天風夜半來鳴鶴
雷雨春深起蟄龍
香入吟窓鈎翡翠
清分坐榻濕芙蓉
幾回鄉夢曾相過
身在徂徠第一峯

文會堂為姑蘇唐以敏題

新築茅堂傍竹林
茅堂隱隱竹森森
朋簪累盞薰陶久

麗澤相資造詣深
明月半窓無俗侶
清風一曲有知音
何時歸棹吳江上
共挹滄浪洗渴心

仁化草堂為曲江黃御史父處士題

為愛茅堂近曲江
雲山疊疊水淙淙
一筇晴雨行南畝
半榻清風卧北窓
少室山人今有幾
杜陵野老古無雙
傳家又得寧馨子
衣繡乘驄在帝邦

恬澹軒為大德觀王道士題

昔年欲問叅同契
暇日曾過恬澹軒
羽客相逢應悟道

黃庭誦罷竟忘言賓墀苔老稀人迹仙丈雲深絕市諠
身世飄然如物外何須更擬訪桃源

都門別意送陳都憲從子佶省都憲畢歸吳

鳥啼花發媚皇州袖拂東風去莫留客計不知歸路倦
鄉心應念倚閭愁百年門第天倫重萬卷詩書世德修
聞道嚴君思仲父看雲白晝卧江頭

河陽亭為吳興潘用中題其孫景善登太學岳之
裔也

潘氏園亭桃李盛栽培先德動遐思好花不異河陽縣
明世應非典午時尊俎當筵留野客溪山入座助新詩
賢孫早晚騰霄漢枯槁行霑雨露滋

題沈進士紀松月扇面

誰將輕箑圖松月一握雙清愜素心雲淨九霄仙兔出
風生萬壑老龍吟廟堂大用期登進海宇餘光仰照臨
珍重烏臺揮動處紅塵相避不相侵

都門別意為曲江黃御史父作

冠蓋如雲出帝都送君何處是歸途曲江秋水鷗尋侶
丹穴朝陽鳳憶雛雙屐行探春信早一尊吟對月明孤
草堂到日多耆舊重畫香山九老圖

送上虞羅御史澄使閩中

使者新裁豸錦衣故鄉便道喜榮歸九重嚴命龍章寵
七袞慈親鶴髮稀堂北花香秋正好越南山色畫生輝
閩天後夜人瞻處執法星光映太微

交代芮御史釗按治江西詩送還京

同年同志復同官客裏相逢握手懽千里歸心辭我易
一年新政繼君難鄱湖水落清秋度廬阜峯高後夜看
朝退金門如有暇老親煩為報平安

贈劉狀元代祀舜帝便道故鄉展焚黃禮

遠將玉帛祀先皇秋鴈寒雲滿路香白髮喜歸梁顥第
錦衣榮過魏公鄉書銜彩鳳光松梓夢繞飛龍在廟堂
憂國憂民丈夫事回軒莫待菊花黃

聞楊亞卿弟宜有御史之擢

郡博先生慶澤深傳家昆季更誰倫
難兄久佐秋臺政阿弟新遷憲
府臣五色雲中雙鳳鳥九重天上對麒麟
匡時更有經綸事不數三蘇與二陳

送胡御史淵還京次留別韻

手持玉斧靖三邊人頌清名繼四賢
戀闕久知心捧日封章幾見力回天
雲開廬嶽迎歸旆水滿鄱湖送去船
萬里同來不同往江亭綠酒興悽然

送姑蘇潘進士暄淮府造墳事竣還京

南浦西風酒一尊鄉情分袂暗銷魂成功已副賢王意
奏績應霑聖主恩家近松陵山有色舟經楊子水無痕
欲知後夜相思處月滿霜臺獨倚門

景泰改元正月一日王潘二進士齎勅獎勞亞卿
楊公有清勤公正之褒且有金帛之賜詩以賀之
中興聖主重賢勞袞冕臨軒遣俊髦寵遇共誇金帛賜
清勤無忝璽書褒九霄雨露新春被一代君臣此日遭
江石蒼生望風采廬山光價兩相高

正統己巳秋客中聞大駕北狩未還驚號賦此

翠華北狩正侵疆未報歸期重感傷
百辟有誰能扈蹕一身無計可勤王
龍沙磧裏秋容慘羌笛聲中夜漏長
悵望何時遂迎復西風吹淚灑蒼蒼

琴鶴軒為王儀賓題

承運朝回脫錦衣
瑤琴白鶴兩忘機
絃中一曲成連至
天外數聲和靖歸
臺榭月明迷素羽
琅玕風動雜金徽
紛紛塵事渾忘却
歌舞何曾滿繡幃

冰壺為前人題

幽人常在雪軒居
恍若清冰置玉壺
晝靜一塵無處著
歲寒三友隔簾呼
閒從芳沼尋鷗侶
睡起開籠放鶴雛
聞道丹青尤絕筆
時時寫擬輞川圖

次韻題李主事叔玉使節還京卷

一點丹心憶翠華
無邊風景送星槎
寒雲渺渺隨秋鴈
孤鶩翩翩帶落霞
自信窮經能致用
誰知憂國總忘家
何當拂袖同歸去
十二街頭掃雪花

次李主事過惶恐灘韻

錦纜牙檣江上過，滔天煙燭起風波。
欲將一臂扶周鼎，可奈三軍作楚歌。
誓死不依元日月，精忠獨照宋山河。
試聽惶恐灘頭水，猶似當年嗚咽多。

景泰庚午客中中秋有感去歲此日有土木之變
鸞輿未復

客裏中秋憶去年，望雲遙拜淚潸然。
唐人未覩朝儀復，漢將誰扶國步顛。
借問幾人隨幸輦，空傳一鴈到冰天。

淒涼最是今宵月莫向千門萬戶圓

謁鄂王祠

南渡君臣社稷輕獨將大義振孤兵兩行淚滴中原地
一點心懸五國城竹帛芳名今照古廟堂遺像死猶生
九原若遇秦奸賊為問誰家父子榮

送朱御史驥出使淮楚

面帶霜威出內臺光騰執法射三台觀風久熟宜民政
按部今施濟世才當道豺狼何日遁朝陽鳳鳥幾時來

知君素有澄清志一點丹心莫暫灰

張評事枕坐累出為處州知事暨丁內艱服闕朝

京賦詩留別次韻奉贈

早歲香名禁籍收腰橫博帶氣橫秋平反有譽傳中外
謫宦無慚任去留鸞鳳終非鷹隼類江湖須抱廟堂憂
朝天此去霑恩寵肯使潮陽困白頭

鴛湖歸棹為姑蘇屯田張指揮作

九重宵旰重兵農閱稼將軍已建功萬頃垂花田似錦

一帆歸棹氣如虹
牙旗光射鴛湖水
鼓角聲傳虎帳風
自古忠臣報明主
濟川勲業是英雄

拜都御史之命留別廣東諸同寅

相親未久即相知
忍向江頭話別離
明主恩深無可報
蒼生望重有何為
舟移南海乘潮發
帆掛東風帶雨吹
明到梅關重回首
天南天北幾相思

寄贈吳中諸友

皇華使者日邊來
叨拜綸音總內臺
四海澄清元有志

百寮表率愧非才
風霜敢謂搖山岳
雨露終期振草萊
却嘆君恩無可報
惟將三尺効涓埃

贈楊僉憲煥進表之京

清白聲華重外臺
化行雨露令風雷
遠將臣子千秋錄
欲獻君王萬壽杯
紫禁嵩呼懽拜舞
黃封宴錫喜追陪
却慚無計相隨去
夢繞飛龍日幾回

久旱得雨憂民之懷頓釋賦一詩志喜

亢陽且久田將蕪
三農老稚皆號呼
帝德廣運化工妙

天瓢一灑雨澤敷豈但炎蒸已盡濯坐令枯槁能還蘇
安得九州總若此蒼生有望饑寒無

壽簡菴王先生

五年不預慶長生遐想高堂喜更榮酒出黃封留客醉
袍裁賜錦照人明算齊龜鶴應無限夢叶熊羆定有徵
昨夜關心望南極衣冠遙拜不勝情

輓大宗伯王文安公

四朝東閣掌絲綸八座南宮領縉紳詞苑文章稱獨步

蘭亭翰墨更誰倫
夜闌忽見星沉壁
夢裏驚聞歲在辰
一卷泉坡吾道在
里人休解紱麒麟

送洛陽嚴進士憲來江西勞功因便道故鄉還京

口銜天語臨江右
勞却功臣便問津
畫舫輕搖彭蠡曙
錦衣歸看洛陽春
從來科目賢才盛
況際朝廷治化新
去去若承前席問
好壚忠赤獻經綸

寄鄉郡朱太守

一郡黎元仰福星
已魁循吏傳中名
愛民不數劉寬恕

律已還高伯起清莫嘆長才淹白髮終期入相慰蒼生
獨慚淺薄登清要補報無能負聖明

題節亭

豫章行臺之艮隅有園園之中有池亭景泰改元大
司寇錢塘楊公巡撫時因其地之潤材之具而創鑿
之者也濬泉育魚雜植花卉四時可觀時予為御史
按治日相往還公嘗樂予于此越二載予承乏都臺
繼公之責任遂駐節焉公暇輒於此遊樂以適興因

以節名亭取詩節勞逸之義也賦近詩二首以志兼
寓慕公之意云

南曹司寇舊園亭
窻戶玲瓏畫不局
新水一池金作隊
繁花滿障錦為屏
非因玩物移心志
且欲偷閑養性靈
有客相過莫相誚
古人憂樂是儀刑

為民為國日勞勤
公暇園亭暫息紛
祇是片時能適興
誰言一飯敢忘君
雨荒堦蘚堆蒼雪
風約池萍破綠雲
安得關西夫子至
看花對酒細論文

寄內叔金上舍

牛眠岡上雨初收，著却儒衣泮水遊。
頭上燭光高幾尺，筆端文彩煥三秋。
登科肯落王曾後，對策還輕賈誼流。
來歲鄉闈文字錄，先煩歸鴈寄洪州。

巡部道上清就中一宿因登草亭次松雪翁韻二首

仙子飛昇在此亭，幾多仙跡寫丹青。
旌陽蛟斬非無術，勾漏丹成信有靈。
引鳳尚傳吹紫竹，籠鵝曾請寫黃庭。

至今談起成真訣龍化人來側耳聽

龍虎山東一幔亭昔人曾此禮空青尋真不用窮三島
演法頻煩拱百靈煉就丹砂出塵世已騎黃鶴上天庭
我來假榻清無限萬壑松風枕上聽

輓胡知縣以子貴封御史致政

擢第推封荷寵榮宦途雖好倦逢迎歸來彭澤心方逸
飛去旌陽骨已輕三徑菊荒誰送酒十洲雲杳自吹笙
百年遺德今何在試聽朝陽彩鳳鳴

送同年盧黃門祥起復之京

十年禁閤著賢聲三載終堂盡孝情
黻服著來痕血淚畫船乘去掛風旌
丈夫大志圖忠節聖主中興重老成
莫嘆前程遭遇晚金甌已復子龔名

倚韻奉答趙中書昂二首

卓犖才華邁子雲紫薇花底散清芬
一池墨水時相近滿案芭蕉日更勤
金匱夜抽書總祕玉堂晝直漏稀聞
宦情莫嘆遭逢晚聖主于今正石文

松雪仙翁非世人玉為肌骨水為神揮毫每見烟生紙
題壁曾煩袖拂塵霄漢十年明聖寵風雲千載壯圖伸
古來書法多名世獨數公權是諫臣

壽漁樂先生七十一

七月四日

繡紱蒼麟在練川孤南光彩照華顛天孫佳節遲三日
萊子遐齡過一年江上昔曾徵釣叟山中今見有神仙
錦袍慶罷長生會明月清風伴醉眠

送陳汝善還姑蘇

相門才子吳中彥袖挾天風遍九圍萬里好山吟不盡
滿船明月載將歸陶潛徑裏香醪熟張翰江頭晚稻肥
君去養親吾未得蒔城空望白雲飛

壽簡菴王黃門先生

親荷推封職再遷皇都畫錦似神仙堂開王母蟠桃宴
人慶堯夫得子年松柏從來遲澗畔芝蘭終見秀庭前
昨宵遙望燕山拜一點孤南照九天

贈何太守盛之高州

面奉綸音下日邊
高涼千里去承宣
華風滿地回枯草
霖雨隨車洗瘴烟
泉落龍湫雙木屐
香凝燕寢一蒲鞭
古來黃霸功成後
便有徵書到潁川

輓浮梁戴布政母恭人

懿德徽音世範模
忽捐榮養入蓬壺
八旬四歲古稀有
七子廿孫今更無
返哺空聞啼宰木
傷心不忍致生芻
牛眠岡上埋朱翟
一道龍光夜月孤

送劉黃門華甫起復之京

讀禮堂中駭服更龍泉江上畫船行封章曾效回天力
簪筆難忘愛日誠水落三秋孤月送山橫萬歲五雲迎
金甌已覆香名久好獻經綸佐太平

次韻酬鄉人王畏齋

江上風高一鴈來文光熒熒照行臺龍珠自有千金價
驥足終非百里才望重詩壇蘇內翰心涵秘學呂東萊
相逢莫嘆知音少題壁曾煩袖拂埃

西江第一樓詩

有序

予巡撫江西之明年值迎恩館燬于火禮須復建而民力不堪筠陽有館有樓有堂新美宏壯迺民家以過制而入於官有司葺以奉公而間曠者也遂謀檄而成之再閱月而畢工藩臬諸君請記于少保大學士陳先生題其樓曰西江第一之樓樓在滕王閣遺址名之以斯取昌黎文公之意謂其瑰偉絕特甲於列郡故也江山風景之勝古今人題咏多矣而登臨之際獨不能無感焉閣之創自唐迄今數百年新之

者非一人然皆循舊名圖以為遊觀之具耳今斯樓也迎拜絲綸于此飲餞制使于此而仰瞻神京俯覽列郡憂國憂民之心寧不惕焉有感乎感其憂以擴克其所當為此吾徒之職也因賦七言近體詩十章美其盛且以自厲不耻續貂用書于此

江上新成第一樓樓中勝槩冠南州圖分太極乾坤定水接扶桑日月浮歌舞蕭條千古嘆經綸虛薄半生憂登臨却益君親念欲報深恩未肯休

江南佳麗滿樓臺一度登臨一快哉雲母屏開涼雨過
水晶簾動暖風來絃歌廣被明時化文獻多生濟世才
惟我致身霄漢上廌袍端不惹塵埃

重屋臨江此日登風光滿眼感懷增好山一帶同今古
勝地千年幾廢興已乏文章追吏部且無德化繼中丞
憑高恨不生雙翼飛傍紅雲捧日昇

山形西峙水流東高架危樓映碧空雙燕舞穿珠箔雨
羣鷗飛散錦帆風朝廷有道三才順海宇無塵一望通

莫倚清秋翫明月錯教人訝廣寒宮

袖拂雲霞覽下方地靈人傑異他鄉
劒江跡化龍光迫鐵柱功成蜃氣荒
高節千年扶世教精忠萬古正天常
樓中懷感休長嘆為我吹簫引鳳凰

層簷矗矗枕滄波勢入空青欲盪摩
贊化却堪旋斗柄洗兵還可挽銀河
山形薄暮雙螺出野氣經春萬馬過
王事關心歸未得倚闌東望白雲多

傑構初成絕點氛佳名新扁重高文
風窓月檻凌千尺

水色山光占十分京口不須誇望海吳門何用數齊雲
太平無事羣生樂得遂清遊感聖君

縹緲江樓十二闌常無溽暑有清寒閒來獨伴水雲坐
長嘯一聲天地寬廬嶽烟開明返照宮亭風靜息狂瀾
非才却繫蒼生望且莫留連盡日懽

獨倚層樓翫物華十三侯郡信無加海天空闊吟懷壯
吳楚微茫望眼賒下飲雙虹垂遠浦高飛百雉起平沙
頻來莫道荒遊樂一點丹心在帝家

飛樓雄冠大江西公暇娛情此一躋隨水落花紅滾滾
連天芳草碧萋萋光生暘谷三山近氣散炎荒五嶺低
興發詩成豪未盡更揮鉞柱倚雲題

題徐高士祠詩

有序

豫章徐高士祠在東湖南洲之上廢置詳於傳志久
矣景泰丙子四月之望予往弔之拜瞻徘徊因竊嘆
曰風節人之大閑也古今蒙耻苟進之徒固不足言
矣其有跡崖壑而志城闕者亦多假隱自名以詭祿

仕風節喪焉獨高士在當時見幾明決四察孝廉五
辟府宰三舉茂材皆辭疾不起而恭儉義讓所居化
服千載之下亦皆景仰企慕其廉貪敦薄之功誠所
謂無用以為用無為而無不為者也於名教中豈小
補哉遂令有司作清風亭於其祠前賦近體詩四章
發幽光以風世道云

一束生芻弔古人荒涼陳迹竟誰倫
南州堂上空懸榻
北岳山中總濫巾
傳列逸民風世教坊題高士式儒紳

夜來間向東湖望幾許清光接富春

青雲夢裏謝夔臯懶受玄纁製錦袍貧賤不荒三逕業
輕肥應薄五陵豪江湖寂寞流風遠光嶽晶熒間氣高
過客紛紛弔遺跡誰輕名利等鴻毛

市隱何曾去買山草堂元在水雲間絕憐巢父能相讓
翻笑林宗不自閒泰華高名藏玉檢斗牛精氣接銀灣
我來弔古裴回久帶得清風滿袖還

思賢亭上詠緇衣雲滿江天隱少微濟世有心非矯俗

傷時無道却知幾碧潭長夜蒼龍卧丹穴何年彩鳳飛
千古地靈人傑頌西山南浦也光輝

次韻寄鄉人陸務軒

不隨令尹賦歸來獨向煙波築釣臺喬木故家推世德
明珠滄海嘆遺才鱸魚正美陪張翰綵服初成學老萊
却愧宦途空竊祿未能甘雨洗黃埃

次韻寄鄉人嚴友蘭

不羨侯門勢絕倫草堂住近綠楊津氣克牛斗三千丈

身卧煙霞五十春，酒肆風流豪李白。
詩壇光價美蘇卿，却慚淺薄渾無補。
空有丹心戀紫宸。

贈致政李少卿

闕

才華李杜同人誇，詩酒有遺風碧山修竹。

闕

東閣官梅興未窮，花下徘徊邀皓月。

闕

對隣翁

相逢謾寫耆英會，四海蒼王仰

闕

輓豐城靜菴楊先生

栽成桃李滿門墻，師道儒名繼紫陽。
舍總思瞻北斗。

絳帷獨夢講東堂
劒江光燄愁將斂
學海波瀾苦不揚
愧我感恩空杖淚
無緣負土服心喪

挽樂僉憲父受封憲幕

能書號草池

高潔無心釣萬鍾
烟霞深處寄行蹤
義方成效門初表
家學能傳誥已封
霜重墨池凋碧草
雲昏筆塚翳蒼松
穹碑樹德當周道
多少行人為改容

和酬楊司寇

愁來無事忽登樓
獨倚闌干瞻帝州
宮闕嵒嵒王氣合

海天空闊行雲收故人有道掌邦禁愧我無能空宦遊
允矣德音振治世詞林孰敢鳴相酬

贈陳僉憲濂進表之京

南薰江上浪花飛使者揚帆向帝畿長劔倚雲橫壯氣
行囊載月露清輝封人仰聖虔三祝遊子寧親喜一歸
忠孝同心不同迹海天凝望欲霑衣

送劉主事昌奉使還京便道歸故鄉

高第雖登不燕安寫騷亭上日忘餐文章漸入歐蘇室

風雅將登李杜壇
廬嶽雲開瞻秀爽
吳江月滿照清寒
思家無計相從去
東望空勞一永嘆

四月望日駐節分宜晚眺有感

山縣蕭條近水圻
民風淳朴靜呼譟
荒村日落笛初歇
古寺月來鐘亂敲
聚草羣蛙喧鼓吹
棲林雙鵲競枝巢
不堪便起懷歸念
頓爾欲將名利拋

慶陽司寇八月十六日得子

中秋華月始流輝
便毓明珠產繡帷
共喜仁人還有後

誰云天道竟無知聞啼已識真英物作頌慚非絕妙辭
仙種從來好花發天香吹到鳳凰池

慶張維學擢鄉郡陰陽正術

儒醫惠菴子也

家世儒醫四海聞兼通造化獨超羣公心薦剡資賢守
清職居鄉感聖君步出杏林觀地理坐依橘井玩天文
惠菴慶澤傳來久濟美行看振二勲

慶陸務軒納穀冠帶

凶年輸穀匪求恩為濟饑荒報至尊國典却須旌大義

寵章自是及高門
峨冠博帶鄉閭羨
偉蹟豐功竹帛存
從此光前還裕後
清風千古動乾坤

輓鄱陽王府丞父

泗水行歌久斷音
傳經有子戴朝簪
共誇身後推恩重
應報生前積慶深
就養不回千古夢
流芳却慰九原心
穹碑樹德當周道
太史文章耀古今

輓鄱陽王府丞母

霜居教子已登庸
節義何慚舉世宗
大史傳書青汗簡

君王誥錫紫泥封無端婺女天邊墜有約良人地下逢
昨向鳳岡岡上弔堂空惟有一孤松

贈漁隱李先生

戈陽少卿兄

白髮蒼顏享壽齡幅巾藜杖適吟情價高未起蒲輪聘
望重頻魁月旦評西澗松筠同晚節北山猿鶴結深盟
自慚薄宦渾無補何日相從共濯纓

榮壽堂為崑山項御史璉題

碧玉峯前榮壽堂高年慈母被恩光霞文帔映童顏潤

珠翟冠籠鶴髮長天祿分來春釀酒錦衣歸去畫稱觴
應知罔極真難報孝道相期更顯揚

送崑山趙進士博還京

畫舫南遊始盍簪錦衣東望又分襟一天風月供清操
滿目江山伴醉吟歸路不辜題柱志到家應慰倚閭心
吾鄉自古多豪傑接武相期振好音

左都御史蕭公以詩見寄依韻奉酬二首

清才落落世稱稀傳得聲華海內思平法獨持因愛物

讜言頻進為憂時霜飛北闕趨朝早日昃中臺退食遲
聞道天恩今益眷應知心與古人期

西江江上鴈聲稀為感交情到處思滿路風塵行部日
一天星月倚闌時君恩欲拜歸心急王事圖成去計遲
終擬秋高遂深願相從待漏話襟期

送姚子大僉憲致仕回

號愛葵嘗為教官後
為御史與余同道

早登丈席晚登臺流得芳聲遍九垓化雨春風胡瑗教
秋霜烈日馬周才數莖白髮老將至三徑黃花歸去來

却恐蒲輪還有召愛葵心志莫先灰

輓永新左御史父

奔走功名性不堪遠將蹤跡寄烟嵐詩朋纔散苦吟歇
仙侶忽招清夢酣十載義方真有效一生德望信無慚
流芳最羨追封事遺向禾川作美談

輓永新左御史母

不飾金鈿與鳳釵自甘勤苦作生涯孟光配德年相若
柳母收功願已諧禾水風飄花亂落楓塘烟鎖玉深埋

微名有贈加身後萬古千秋第一儕

輓錢塘鄭僉都父師善翁

白髮朱衣耀寵光化工獨報行非常善從伊水天民訓
義本燕山竇氏方雲外忽傳黃鶴去江頭空見白鷗翔
于今泉夜真含咲有子才高總憲綱

忠武堂為蘇衛張指揮題

留侯世業在平江忠武名堂世莫雙効力已膺三聖寵
宣威曾受萬人降葵心向暖瞻天闕劒氣生寒鎮海邦

我欲題詩揚盛烈却慚未有筆如杠

環翠軒蘇衛張指揮別墅作軒環植萬柳故名

最愛將軍別墅間一軒萬柳翠相環
風翻密葉驚春浪烟鎖重陰訝曉山
賞節彎弓曾獨射贈人分袂亦同攀
登高若見閑松竹還為移栽虎豹關

寄鎮守宣府李執中僉都

彭城分手六年餘遠道何由問起居
夜月空流千里夢秋鴻閒寄數行書
安邊勲業今無忝蓋世聲華古不如

聖主憂民望康濟好宣仁化遍寰區

送黃給事中暉使滿刺加國

聖主當天恤遠人分封有詔選能臣
錦衣榮動江南畫玉節光搖海外春
定使百蠻皆感化從今重譯盡來賓
古來豪傑多名世接武相期繼後塵

送同年朱僉憲驥之廣西

青年雅望冠中臺荷寵歸寧亦快哉
親舍暫分遊子去蠻邦久迓使君來
林深丹桂行雙節野近蒼梧奠一杯

道路逢人莫長嘆廟堂方棟棟梁才

送同年楊主事益蘇松蹈勘旱災事竣還京意有

所諷

傳得綸音自帝都東南凋瘵頓然蘇憂勤已辯崔嵬樹
忠節還陳鄭俠圖滿路懽聲喧鼓吹逼人清氣湛冰壺
回轅莫向關河滯延佇方期贊大謨

題壽星慶琴川松溪陳宗盛迺尊竹軒翁

壽六十
一歲十

月十五日
初度之辰

小春望日啓華筵初度逢君壽福金花甲數周纔過一
椿齡筭永定逾千雨滋軒竹枝方盛霜老溪松節愈堅
昨夜行臺懸北望孤南星彩照琴川

襄毅文集卷四

欽定四庫全書

襄毅文集卷五

明 韓雍 撰

七言律詩

辛卯午日小宴追憶先朝蘇題人日應制韻錄似
遊擊從事諸君

午節隨鑾曾幾回六龍親御五華臺驚看羽騎緋衣度
細覩天顏寶扇開朝退聲移蒼玉佩步歸心醉紫霞杯

金輿一去無消息此日重逢百感來

正月十九日寄弋陽李少卿三首

時發安仁值
風雨道宿

遠道輶車日日牽羨君蹤跡似神仙
白雲萬頃陪深隱紅日三竿任晏眠
繞座塤箎聲迭和滿堂繡綵業相傳
非才亦有山林志未報君恩空悵然

功成不被利名牽人慕高風邁謫仙
松逕晝開教鶴舞桑林春老看蠶眠
一生勲業三朝錄千古文章四海傳
愧我同心不同迹弋山東望思悠然

情緒遊絲裊裊牽錯教人望似登仙關山道遠何時歇
風雨衾寒到處眠鄉夢却嫌雞喚醒客愁偏厭漏聲傳
知君此夜渾無此高擁青綾足宴然

贈李少卿兄漁隱先生二首

高卧煙霞一布衣平生蹤跡似君稀
邑門無事不曾到鄉社有情常醉歸
荷斧斫來林笋嫩引泉灌得藥苗肥
山中修養年年好焉得相從便息機

松花為食草為衣養道延年過古稀
留客必須春色去

登山常伴月明歸，偏憐野水羣鷗好。
不羨侯門駟馬肥，更喜追陪有難弟。
晚年投老最知機。

同李少卿遊龜峯寺次其韻二首

環寺有三十二峯

繫却蘭舟弋水濱，亂雲堆裏訪山門。
年深古栢多仍在，春後殘梅半不存。
燕尾溪流斜斷岸，羊腸路繞曲通村。
徘徊更愛羣峯好，一洗平生兩目昏。

洞天深處遠江濱，路入烟霞是洞門。
環座好峯千狀出，滿潭清溜四時存。
曾磨厓石疑元結，欲詠梅花愧後村。

搔首何堪自東望親闈久矣曠晨昏

送楊憲副宜之廣東

持節南巡久擅名拜官重去副羣情五年城下新恩至
駟馬車前故吏迎青草瘴消風漸轉黃梅雨歇日初明
臺端見我同寅舊為道相思遠寄聲

送松江黃郎中琮廣西審刑竣事還京

持節平反遵聖謨遠人處處動懽呼波吞瘴海窮鱗起
風轉炎荒腐草蘇歸路總誇空惹改過鄉莫待飽尊罍

好思南顧憂民切早獻當年鄭俠圖

送王府丞弼起服之京

壠樹啼殘謝豹聲麻衣人換錦衣行連天水上春帆度
捧日雲邊曉珮鳴京郡齊民懷父母廟廊虛位選公卿
知君此去應遭遇好罄丹心佐太平

西軒詩為泰和蕭孟廉題少師孟勤先生兄也

築得高軒配穎濱軒中人物異常倫一生義氣甘韋布
四海清風動縉紳柱倚殘陽吟到景簾鉤新月醉芳辰

武山遙背還多趣太史文章已具陳

題松泉圖壽大司寇楊公

澗畔孤松澗下泉清流高節自年年飛空作雨流偏急
向晚凌霜節愈堅一派源源方赴海千尋鬱鬱定參天
蒼生膏澤明堂棟都望君家祝壽筵

題松鶴壽漁樂陳先生

雞羣獨立昂藏鶴澗畔孤撐偃蹇松聲動九臯風露夜
節凌三徑雪霜冬頂深丹後色應變脂化苓時陰更濃

長歲雲林有餘慶桑軒還進大夫封

送陳御史述審刑事竣還京

南浦樓前鼓角鳴朝天人著繡衣行晴波浩蕩魚龍舞
遲日光華草木榮一載平反無愧色千年遺愛有賢聲
同鄉未得同歸去目送征帆過葑城

裕軒為鄉人徐文輝題

最愛高軒境界幽軒中人物異常流丰標秀倚靈岩曉
雅量宏吞震澤秋萬頃烟霞吟不盡四時風月醉還留

何當拂袖歸山去過此陪君日唱酬

午日寄楊司寇詩

丙子端午積霖初收天宇明淨予登聚奎樓觀東湖
競渡徘徊久之取酒獨酌因憶景泰改元之歲今大
司寇錢塘楊公巡撫茲地予叨御史按治辱公厚愛
是歲午日嘗從公于此登眺公具尊俎酌予歡洽殊
甚而今六年矣奔走宦途待罪于茲求如公之可交可
敬可師法者更不能得遂作一詩寄予嚮仰之情公

必能酬我教我也辭意潦草皇皇恐恐

陪觀競渡倚高樓冉冉流光又六秋為客到今空自感
何人來此可同遊蒲觴滿引終難醉蕭鼓喧聞未破愁
聊寫新詩寄知己江東雲樹重回頭

寧波周御史父母雙輓

士行無虧女德充篤生佳器見登庸人誇偕老同觀化
帝念齊賢並錫封七尺冢棺埋對玉一坏新土種雙松
幽光更有銘文發長夜神遊總咲容

宿東山寺和九川李少卿韻

山可閑登水可臨
禪家勝景動長吟
水花初摘香移沼
山木漸除風滿林
海內有人愁盛暑
雲中無路散清陰
相逢最感頻相勉
報國終期罄赤心

景泰丙子六月十七日便道與大理少卿弋陽李
公遊上清明日遊仙巖皆賦七言近體詩一章書
之脩然亭

九載名山五度過
山容靄靄勢嵯峨
洞穿海外飛仙鳥

水接天中織女河白鶴盤風秋氣近紫簫吹月夜涼多
宦情也動幽棲念可奈深恩未報何

扁舟覽勝故人同勝境分明似畫中陰洞滿厓無路到
晴岩一竅與天通留傳賸見神仙跡開闢冥思造化功
我有鄉山歸未得不堪回首白雲東

重遊臨川疎山寺次舊韻留題

時秋近
亢旱

一點丹心萬斛愁登山消遣記重遊滿懷冰雪空三伏
屈指光陰近八秋海內未瞻雲氣合天中漸見火星流

清風涼雨蘇炎旱我為蒼生叩蓐收

送南城貢士左贊再赴春闈

筆陣詞鋒六館推
南宮兩戰未登魁
何蕃再省名逾重
維翰重升志不灰
飛鷁秋分滕閣雨
化龍春聽禹門雷
太平橋上鄉人衆
望爾高車駟馬回

寄鄉友徐文輝

家林幽僻遠塵闕
世事浮沉總不關
下榻有時延上客
東樓終日望西山
醉鄉風月情偏好
靜裏乾坤意自閒

獨我相思未相見海天雲樹鎖愁顏

延常山楊醫師灸火詩以酬之

其家有積慶堂

浙水西頭積慶堂堂中人物異尋常軒岐妙術傳三世
泰華高名動四方丹火暖時薰艾劑橘泉清處淬針芒
相逢莫厭頻頻療海內蒼生多病傷

張式之僉都致政既歸四明以詩寄予依韻奉酬
社稷功成歸鑑湖卧龍蹤跡孰能屠自憐投老入佳境
應笑時人行畏途鳴世有聲驚墨客平蠻無愧憶征夫

煩君謾赴耆英會恐有徵書出帝都

輓寧波王司空母張夫人

高壽榮恩享北堂平生德善總非常
花封遺愛思賢助栢府傳聲頌義方
瑤水夜深仙樂動家園春靜板輿荒
牛眠岡上新埋玉多少行人起贊揚

寄嘉興延太守同年

共羨嘉興太守賢清風善政路人傳
連城白壁無瑕玷合郡蒼生解倒懸
西浙分襟驚數載南州回首憶同年

煩君此去尤珍重莫讓龔黃美自專

題湖口上鍾岳寺

上方風景最清幽駐却雙旌試一遊絕壁有岵皆起閣
歸僧無路只乘舟天垂廬嶽擎孤柱湖落湘江界合流
翹首不堪東北望思鄉又感廟堂憂

送李咸章賢良奉使還京

相門有客清如玉聖世徵賢喜得人嶺海一麾宣寵命
鄉園五彩慰慈親星河夜靜仙槎穩江月秋高素練新

去去青春莫虛負丈夫功業在經綸

白雲飛送上青雲仙子才華信不羣雙壁已生烟自潤
九苞初振錦成文從來豪傑多名世此去勲勞在致君
廊廟憂民如見問博施無計愧忠勤

同弋陽李少卿宿蓮塘寺次古詩韻

小小禪房似畫船連床風雨擁寒氈幾年受任慚無補
千里論文幸有緣松逕雲深迷晚鶴槐庭霜重斷秋蟬
留題最羨文章伯贏得芳名後世傳

山寺岑巖倚碧峯偶來假榻快心胷行營漏起三吹角
古殿香然一扣鍾故舊情深懼會合聖明恩重幸遭逢
素餐却念農家苦烟火東林尚夕春

壽詹事府唐錄事先生

經緯文章海內傳才名不數兩疏賢青宮初喜承三接
紫誥行看拜九遷墨色帳前羅士子蟠桃花底醉神仙
佳辰不預長生會山斗遙瞻祝壽筵

送僉都御史余公奉使還京

久司風紀位都堂近拜天恩使故鄉
玉斧飛霜無玷缺
錦衣行畫有輝光
思家夢叶纔溫席
戀闕情懸又促裝
奈我同心不同迹
五雲翹首思茫茫

夜雨西窓始盍簪
春風南浦又分襟
論文久契芝蘭味
圖報相期鐵石心
桃浪一江行色壯
錦雲千里故情深
君才自是人中傑
入相行看拜玉音

水滿春江燕子飛
喧天鼓吹送君歸
許身報國今誰並
持節還鄉古亦稀
龍虎風雲欣際會
山光草木賸光輝

相思後夜瞻霄漢執法星芒耀太微

酒罷西江第一樓還朝人物異常流作官最重鄉邦羨
奉使能分社稷憂此去橫班須獨對遙知前席定三畱
好將民隱條陳盡為報皇情寵眷優

壽徐裕軒詩

正月
三日

玉雪風姿照美髯太平初度樂無邊天開令節纔三日
人祝遐齡又一年自古中原有麟鳳于今平地見神仙
知君已得長生術歲歲歌詩慶壽筵

送胡共之參政赴廣東

時予趨召回京
會別于富春

江頭樽酒話襟期
君欲南征我北馳
十載交遊恒間闊
一時相見又分離
海天綠樹春雲望
臺閣清燈夜雨思
此後重逢問何日
鵬鵬應不久藩籬

清明謁三陵道宿僧寺次姚亞卿韻二首

東行聯轡扣禪關
樓閣孤撐返照間
撫景漸看三月近
尋芳聊趁一時閒
風翻凍柳鶯聲怯
雲薄空山雨意慳
何事匆匆不遑樂
九重咫尺是天顏

多年荒寺枕山肩人厭蕭條我獨憐市語不喧春鳥嘒
梵音初動晚香然數杯濁酒催詩飲一榻清風伴月眠
翹首不堪心事切紅雲高處白雲邊

挽劉司寇廣衡

高步雲霄近上台司刑司憲展多才調元未副蒼生望
觀化何堪白髮催雙履無聲趨曉禁五花有蹟在秋臺
東風執紼都門道目斷天南不盡哀

贈璇上人南歸

脫却塵凡守寂寥，遠公門下特高標。
錫飛已占吳山勝，杯度何妨楚水遙。
南壑蘋蘩春自薦，北堂甘旨晝親調。
憐君獨遂還鄉願，夢繞江天恨未消。

送葉僉都與中巡撫兩廣

東山強起副皇情，榮拜都堂暫遠行。
重寄一麾兼兩鎮，先聲萬里慰羣生。
風恬滄海鯨波淨，雨洗黃塵鳥道清。
自古安邊重韓范，終歸黃閣佐承平。

挽劉詹事宗器

詞林璧水久蜚英晚輔春宮重老成操履一生行古道
文章千載占時名調元未見登黃閣觀化俄聞上玉京
惆悵東風招不起懶揮鐵筆寫鄉評

松軒為陳詹事安簡乃弟題

雙樹亭亭蔭華門隱君難與世人論七松處士遺風在
五柳先生舊業存洗耳靜聞清籟響科頭坐愛碧雲屯
休徵已叶難兄夢位接三台拜寵恩

送張進士養病回蘇州

瓊林深處正翱翔忽拜殊恩望故鄉
桃葉波平歸棹穩柳花風細賜衣香
參苓調養回元氣甘旨懽娛慰斷腸
獨我分携重惆悵海天翹首白雲飛

高郵吳司訓陞原武教諭鄉人也詩以送之

原武枕黃河

手栽桃李滿孟城獻績金門荷寵榮
百里儒官司教化一方人物賴陶成
研硃點易芹香暖捲幔觀瀾雨氣清
此去休言官獨冷顯揚還擬振家聲

輓僉都御史左周器

為民為國一生心
晚進中臺感激深
明主有恩方倚重
憐君無命忽銷沉
斗山光價流中外
墓道銘章耀古今
我有深情招不起
禾川南望引長吟

輓國子鄒檢討

太僕丞允隆之父

栽成桃李滿皇都
懶逐風塵走宦途
林下一人方入會
山中九老不成圖
鳥呼筆塚雲烟起
闕
詩壇草木枯
欲問流芳在何處
高岡真有鳳凰雛

慶左進士贊擢稽勲主事

義獻書名屈宋文春雷聲裏上青雲天官分職非常選
聖主掄才喜出羣鳴珮曉聽雙闕漏揮毫時叙百僚勲
煩君莫負平生志畱取芳名後世聞

寄鄉友沈文用

沈家林館最清幽曾伴相知載酒遊宦跡北馳纔隔歲
鄉心南望幾經秋芳春桃李開花未深夜壺觴醉客不
羈絆無能尋舊約題詩聊為主人酬

寄鄉友陳宗盛

客況鄉情正不禁遠勞一价送佳音開緘快覩龍蛇字
念舊深知鐵石心萬里海天春渺渺半窗風雨夜沉沉
相思苦被浮名絆尊酒何時更盍簪

奉送尊師唐先生判金華

驛亭清酒汎黃花舊館諸生滿路遮親炙久期聯玉笋
分違遙送判金華從來儒術堪經世此去鄉心莫戀家
早使提封遂康濟趨朝終擬拜黃麻

輓徐給事中父太學生

治易

花落梅窓香不聞
中年觀化出塵氛
眉山蘇老能傳業
太學何蕃未策勛
玉洞露寒閒點易
瓊樓月滿靜修文
流芳却有推封詔
夜夜龍光照古墳

慶陳梅軒封御史

鸞書飛舞下天闈
光射東吳孝義門
七品一官封子職
十年兩世拜皇恩
湖山草木增新彩
鄉里衣冠慶達尊
我有深情不能預
海天空望白雲屯

具慶堂為程員外宗題

秋臺績奏稱才良寵命新頒具慶堂數朶彩雲將雨露
兩簪蒼雪耐風霜光搖金翠瞻天近景駐桑榆愛日長
移孝為忠丈夫事好攄忠藎答君臣

寄題何揮使西軒

最愛西軒稱此心分明城市有山林石潭倒浸芙蓉朶
竹逕斜穿玳瑁簪塵印荒苔人跡少歌傳叢樹鳥聲深
宦遊未得陪佳賞翹首江天想像吟

重慶堂為御史鄭時題時伯父為秋官亞卿父與

大父皆受封

世父登朝猶子繼推封
共喜拜恩頻幾函誥勅來雙鳳
三代簪纓見四人
橋梓清陰高覆下芝蘭香氣舊和新
光榮今古誰能及圖報應須作蓋臣

壽黃亞卿母八十初度值清明

八旬初度逢佳節有子登朝喜氣偏
九鼎味烹新賜火一爐香裊舊藏烟
門迎化日恩光近身帶晴霞命服鮮
從此遐齡應不老願陪冠蓋慶年年

賀黃侍郎

人子有親白首康寧者固難有而拜封命就祿養者尤難至於華誕聿臨公卿縉紳詩歌相慶再拜舉觴上壽於其前則天下古今之極難也秋官亞卿黃廷臣之母太淑人壽屆八旬初度之辰華筵盛設冢宰王公閣老呂學士輩多為詩若文以慶且拜而壽之榮動朝野廷臣可謂孝也已其樂何如哉用賦五十六字以寫忻羨之忱兼識私感

高年就養值生辰千載光榮萃一門滿座公卿齊再拜
獨披冠服受雙尊也知祖考平生德真是君王曠世恩
愧我有親如不得醉歸惆悵幾銷魂

送周亞卿乃子經赴試山西

過庭爭羨白眉良暫假晨昏歸故鄉天上祥麟元有種
月中仙桂豈無香關山夜靜書聲遠場屋秋高筆陣忙
去去初心莫荒怠早期步武謁明光

輓鄭侍郎父九十物故

孫時為
御史

子榮孫顯拜恩殊耄耄年來萬事虛衛國空傳武公頌
濟南間却伏生書寶函光鎖雙龍誥深院塵封駟馬車
太史文章發潛德美談千載播鄉閭

海寧伯受誥券程僉都賀之以詩予亦次韻以賀
鐵券金書賜重臣勲勞名世有誰倫寶刀曾斬南溟蜃
鐵騎常清北塞塵帶礪河山盟誓重丹青臺閣像圖新
威名從此傳邊朔應羨中朝有鳳麟

輓戴處士

善丹
青

早携書劒住皇都絕筆丹青近世無
春苑池邊曾待詔
輞川莊上自成圖半窓歸夢隨春斷
八極遊魂入夜孤
多少新詩述潛德應憐振後有雙雛

謝夏季爵惠大摺扇

三伏炎蒸似甑炊故人巨簔喜相遺
垂天雲翅鵬初下
午夜潮聲月半虧諸葛謾勞麾白羽
謝安何用取蒲葵
仁風日日宣揚處欲謝慚無絕妙辭

輓禮部尚書掌太常事蔣公

出俗離塵荷簡知歷登清選事神祇衣冠八座聯宗伯
禮樂三班屬后變仙蛻已輕蟬脫盡洞簫初遠鶴歸遲
剡川一曲遺聲在不似人間薤露悲

次韻書感酬夏季爵大理

素飡空費館人炊報國無能效拾遺黑髮任從愁裏變
丹心忍向閭中虧十年宦海驚風浪千里吳淞憶露葵
悵望雲山歸未得且將幽興寄新辭

送太常陳少卿致政還錢塘

宦成有子繼書香
恩許辭榮赴草堂
直道一生無愧怍
斯文千載有輝光
秋江白鳥迎書舫
晚徑黃花伴酒觴
招起坡仙與逋老
醉吟風月共徜徉

錫老堂為陳太常題

草堂舊築傍吳山
恩許仙翁此燕安
白髮光陰閒裏度
紅塵蹤跡靜中看
賜金散出供春釀
世祿分來薦曉餐
一枕南窗高卧穩
可應飛夢到金鑾

送陸司寇乃兄還四明

平生不識利名途手足情牽到帝都
棠棣有詩方燕樂菊花無主恐荒蕪
霜催斷鴈離秦塞潮引歸鷗入鑑湖
可奈季方畱不住秋臺目送海雲孤

輓嘉定陳參政父

衍慶親承聖主恩紫薇仙館度朝昏
榮身自寤盧生夢觀化誰招邵子魂
千載風流雲水逝一生心事菊松存
穹窿山下虹光起應有崇碑表達尊

送王黃門汝霖使占城

綸音面奉出彤闈
封建蠻邦賸有輝
文采驚人丹鳳下
詞章華國慶雲飛
風恬海道春帆度
花滿鄉山畫錦歸
宣布皇威光寵命
趨朝真擬賜牙緋

二月二十九日蒙恩賜椰子三枚賦此志感

海邦佳品貢來新
中使傳宣使近臣
金母仙瓜差可儗
楚江萍實豈堪倫
剖開玉碗光偏潤
瀉出瓊漿味獨真
千載深恩無可報
拜瞻嵩嶽頌嚴宸

輓薛司寇

歷轉華階三十春，可堪倏忽謝昌辰。
兩京無復司邦禁，四海空期秉國鈞。
彝鼎勲名成往事，斗山光采憶斯人。
同朝未致生芻蕘，滿眼西風倍愴神。

庚辰十一月五日喜雪有作錄呈同寅林公

凍雲初合曉陰陰，和氣融成瑞雪深。
寒壓宮牆分玉壘，輕霑臺樹作瓊林。
燮調豈但元臣力，感召真由聖主心。
預喜明年兆豐稔，有滄三誦引清吟。

輓崔亞卿父

孝廉為行義為方衍慶生賢入廟廊天上錫封恩愈厚
玄中觀化夢何長武陵溪香迷塵世少室山空閑草堂
數尺高墳三酹酒千年寵渥有餘光

送常熟章主事律歸省

前監察御史
孟端之子

一門榮顯世稱良拜寵寧親更有光海上卧龍猶未起
天邊鳴鳳忽來翔花迎宮錦秋容好人醉黃封暮景長
我亦懷歸歸莫遂不堪回首白雲鄉

天順癸未夏大司空南宮白公省堂之後以盆池植

蓮數本六月中旬有花亭亭出水間世傳植蓮須穀
雨前過此而植則無花惟此蓮五月纔植今已相次
盛發而初發一朶尤高潔可愛異于常品他公館寓
第雖先穀雨而植者猶未有花是誠司空公之賢超
越羣輩故造物者先時發此以彰美之況公以忠清
剛正簡在聖衷年逾強仕已峻擢柄用若此異時進
台衡掌鈞軸展大謀猷建大勲業以儷美古之大賢
君子不卜可知是又必宰造化者預以此而示兆也

公乘暇具酒肴延太子少保大司馬馬公亞卿薛公
王公霍公同賞雍泰年末亦獲濫預用賦七言近體
詩二章紀一時之盛且留為他日之美談

中臺臺下石池蓮偏得純陽氣脉先開出好花香十里
留為清賞集羣賢風搖翠蓋斜擎露水護紅幢細引泉
賓主相忘看不厭酬杯猶擬碧筩傳

把酒臨池共賞蓮主賓盡美更誰先東朝少保人中傑
南省司空天下賢十丈漫勞誇玉井雙頭不用數天泉

何如此會真難得應與瀟溪蹟並傳

輓內閣呂逢原學士

贊化調元未盡才哭親聲裏動悲哀九重深悼宣公逝
四海空期聖相來華國有文藏玉署捧天無夢起芸臺
不堪淚眼頻南望幾見紅雲揜上台

輓大理王卿仲宏

風節如君世所難功名未竟忽凋殘徒聞清議推楊震
不遂蒼生望謝安棘署烏呼人已遠玉壺冰盡月空寒

憐才獨我相知久一覩遺容淚一彈

隆恩堂為魏中書題

衍慶垂休荷寵褒孝思端可答劬勞旋除宿草焚黃紙
重寫遺容換錦袍帝德有光天地大賢名無玷日星高
華堂從此鄉人羨應覩朝陽彩鳳毛

送王評事還鄉展墓迺翁尚書公先以王事歿於
邊

久承勲蔭列清班終慕情深詔許還寒鴈伴人投故國

西風吹淚落空山椒漿難起忠臣夢霜露應彫孝子顏
得遂哀哀謝明主早來圖報濟時艱

輓劉宗文

處士星沉山月高江湖處處哭詩豪義聲曾濟鄉人患
命服親承聖主褒晚翠亭荒松自偃漕溪原冷鳥空號
斯文從此成長恨懶對西風讀楚騷

壽榮詩沈希仁為徐觀求

並享遐齡並受封佳辰常集壽筵中共誇秀氣鍾賢子

齊着緋袍作醉翁
蔗境光陰應自喜
華亭風月許誰同
千年盛事君恩重
好語諸郎早效忠

謝劉廷振員外刻圖書

誰鑄玄璧巧成章
工部才優筆力蒼
鼎足釵頭無玷缺
垂金屈玉有輝光
應時文字憑私記
遺後詩書賴永藏
感荷高情未能報
且煩毛穎一揄揚

同着宮袍謁建章
憐君久滯鬢毛蒼
鳳巢阿閣終呈瑞
玉蘊崑山已露光
當道豈能私用舍
老天先自定行藏

聖明早晚求恬退高步巖扉重顯揚

送劉節落第還吉水狀元文介公之子

一經已喜捷京闈暫屈南宮志未灰不學孟郊空墮淚
應知蘇軾甚憐才朝廷正爾崇科目家世從來作大魁
好向芸窗加百倍他年洗耳聽春雷

天順庚辰十一月十八日承巡撫大同宣府之命
閏月七日陞辭蒙恩賜勅賜酒飯既退朝蒙召至
文華殿天顏咫尺褒諭再四復蒙賜諭中官賜酒

飯賜寶鈔三千貫皆前此所無歸而戒行賦此書
感且以言志

淺薄深慚祿久叨忽承嘉命敢辭勞璽書付託兼強鎮
天語丁寧特寵褒宴賞頻煩真異數風雲慶會幸相遭
感恩欲問何由報誓使豺狼遠遁逃

是日啓行六卿臺長諸公祖餞德勝門外既晚宿
彌陀寺明旦別去酬寺主衍公一律

塞外一麾兼兩鎮撫巡叨拜聖恩優同朝諸老聯鑣送

古寺高僧掃榻留剪燭夜談鄉思好膏車明發宦情憂
來年奏捷應歸覲還擬停驂此地遊



襄毅文集卷五